

30 Pelajar ASEAN Sertai AUN Summer Camp 2025 di UPM, Fokus Isu Kelaparan dan Keselamatan Makanan



SERDANG, 13 Ogos – Seramai 30 pelajar dari lapan negara ASEAN menyertai ASEAN University Network (AUN) Summer Camp 2025 anjuran Pusat Antarabangsa Putra (i-PUTRA), Universiti Putra Malaysia (UPM) dengan kerjasama Fakulti Sains dan Teknologi Makanan (FSTM) UPM.

Program selama dua minggu itu memberi fokus kepada cabaran global berkaitan kelaparan, kekurangan zat makanan dan keselamatan makanan melalui pendekatan pendidikan, jangkauan komuniti dan inovasi. Ia selaras dengan Matlamat Pembangunan Mampan (SDG) 2: Kelaparan Sifar dan Keterjaminan Makanan.

Pengarah i-PUTRA, Prof. Dr. Alyani Ismail berkata, program ini menginspirasi peserta untuk menjadi agen perubahan yang aktif menyumbang kepada pembangunan mampan, selaras dengan SDG 2.

“Ia menekankan usaha menamatkan kelaparan, mencapai keselamatan makanan, meningkatkan taraf pemakanan dan mempromosikan amalan pertanian mampan. Peserta turut diperkasa dengan pengetahuan, kemahiran dan alat praktikal untuk menangani isu keselamatan makanan sambil memupuk kefahaman rentas budaya dan menggalakkan kerjasama serantau,” katanya.

Sepanjang program, peserta mengikuti pelbagai aktiviti termasuk bengkel dan seminar berkaitan sistem makanan mampan, pemakanan dan pertanian; pameran penyelidikan yang dikendalikan pelajar; serta program jangkauan komuniti seperti kempen derma makanan, kesedaran pemakanan dan projek pertanian bandar.



AUN Summer Camp 2025 turut merangkumi komponen edutourism di bawah inisiatif Kementerian Pendidikan Tinggi (KPT). Peserta dibawa melawat ladang, fasiliti penyelidikan, tapak pengeluaran makanan dan projek komuniti UPM bagi memberi pengalaman pembelajaran secara langsung serta meningkatkan kesedaran terhadap amalan makanan mampan dan usaha Malaysia memperkukuh keselamatan makanan.

Prof. Dr. Alyani turut menggalakkan peserta memanfaatkan sepenuhnya peluang sepanjang program ini.

“Kongsikan idea, dengar pandangan rakan peserta dan pulang bukan sahaja dengan ilmu, tetapi juga jaringan persahabatan kukuh merentasi negara-negara ASEAN,” ujarnya.